



# LÖG SÁTTAR

## 1. gr. Fagfélag sáttamanna

Félagið heitir Sátt og markmiðið er að það verði fagfélag sáttamanna. Lögheimili félagsins og varnarþing er í Reykjavík.

## 2. gr. Skilgreiningar

Sáttamiðlun er lausnamiðuð sáttumleitun í ágreiningsmálum milli einstaklinga, eins eða fleiri, milli einstaklinga og lögaðila eða milli lögaðila. Sáttamaður er óhlutdrægur þriðji maður, sem aðstoðar þá sem vilja þannig freista þess að leysa ágreining sín í milli.

Með orðinu sáttamiðlun er átt við það sem nefnt er *mediation*, *mekling*, *rettsmekling* eða *meðling* á erlendum málum.

## 3. gr. Félagsaðild

Félagið er samtök fagfólks sem vill vinna að framgangi sáttamiðlunar við lausn á ágreiningsmálum á Íslandi. Markmið félagsins er að vinna að skipulagningu viðurkennds náms hérlandis í sáttamiðlun, sem veitir réttindi til að vera sáttamaður vegna ágreinings sem risinn er eða er til meðferðar fyrir dómstólum, stjórnvöldum og á öðrum vettvangi.

Félagar í Sátt skulu hafa lokið háskólaprófi.

Félagsmenn skulu fylgja alþjóðlegum siðareglum sáttamanna.

## 4. gr. Tilgangur

Tilgangur félagsins er að vera sameiginlegur vettvangur þeirra sem vilja stunda sáttamiðlun og afla sér menntunar á því sviði og stuðla að því að slík menntun bjóðist hér á landi.

Félagið skal m.a.:

- vinna að skilgreiningu á starfssviði sáttamanna,
- stuðla að því að komið verði á viðurkenndu námi í sáttamiðlun hér á landi sambærilegu viðbótarnámi fagfólks í Evrópu,
- stuðla að því að sáttamiðlun verði viðurkenndur valkostur við aðrar leiðir til að leysa ágreining í samfélaginu,
- veravettvangur endurmenntunar, fræðslu og upplýsinga um sáttamiðlun fyrir félagi og aðra sem áhuga hafa á viðfangsefninu,
- mynda tengsl við sambærileg félög í öðrum löndum,
- vinna að framgangi sáttamiðlunar eftir því sem stjórn félagsins ákveður hverju sinni.



# LÖG SÁTTAR

## 5. gr. Stjórn

Stjórn félagsins skal kosin á aðalfundi félagsins til tveggja ára í senn. Stjórnina skipa fimm félagsmenn. Formaður skal kosinn sérstakri kosningu en aðrir stjórnarmenn skulu skipta með sér verkum ritara, gjaldkera og meðstjórnenda. Þá skulu á aðalfundi kosnir tveir skoðunarmenn.

## 6. gr. Listi yfir starfandi sáttamenn

Félagsmenn Sáttar geta óskað eftir því við stjórn félagsins að komast á lista yfir starfandi sáttamenn sem birtur er á heimasíðu félagsins.

Félagsmaður sem óskar eftir að fara á listann skal lýsa því yfir með skriflegum hætti að hann muni fylgja siðareglum Sáttar að öllu leyti og sinna starfi sínu sem sáttamaður af kostgæfni og fagmennsku. Jafnframt skal hann leggja fram ferilskrá og staðfestingu á námi á sviði sáttamiðlunar sem birt verður undir nafni viðkomandi á heimasíðunni ef beiðni hans er samþykkt.

Sáttamaður skal hafa lokið viðeigandi menntun á sviði sáttamiðlunar sem nemur að lágmarki 52 kennslustundum. Stjórn Sáttar skal meta í hvert sinn hvort að menntun félagsmanns uppfylli framangreint skilyrði.

## 7. gr. Aðalfundur

Aðalfundur skal haldinn á fyrsta ársfjórðungi ár hvert. Á aðalfundi skal fjallað um skýrslu stjórnar, fjárhagsmál félagsins, lagabreytingar og önnur mál löglega upp borin og ákveða árgjöld félagsmanna. Tillögur um lagabreytingar skulu berast stjórn félagsins minnst tveimur mánuðum fyrir aðalfund.

Boða skal til aðalfundar með dagskrá bréflega eða með netpósti með fjögurra vikna fyrirvara. Lagabreytingatillögur fylgi fundarboði.

Félagsmenn sem ekki hafa greitt félagsgjöld hafa ekki kosningarétt á aðalfundi félagsins. Reikningsár félagsins er almannaksárið.

## 8. gr. Þátttökugjöld

Heimilt er að krefja utanfélagsmenn og þá félaga sem ekki hafa greitt félagsgjöld um hærri þátttökugjöld á ráðstefnur, námskeið og aðra dagskrá á vegum félagsins en skuldlausu félagsmenn. Félagsmenn sem ekki hafa greitt félagsgjöld í tvö ár samfleytt falla af félagaskrá að undangenginni tilkynningu.



# LÖG SÁTTAR

## 9. gr. Gildistaka

Lög þessi öðlast gildi á stofnfundi félagsins sem boðað hefur verið til með lögmætum hætti.

## 10. gr. Slit félagsins

Verði uppi óskir um að leggja Sátt niður, þarf tillaga samþykki 2/3 atkvæðisbærra fundarmanna á tveimur aðalfundum, og skal á þeim fundum taka ákvörðun um ráðstöfun á eignum félagsins. Félagsmenn eiga ekki tilkall til eigna félagsins.

---

Lög Sáttar voru samþykkt á stofnfundi 22. nóvember 2005.  
Samþykktar voru smávægilegar orðalagsbreytingar á aðalfundi félagsins 30. apríl 2008.  
Samþykktar voru breytingar á lögnum á aðalfundi félagsins 12. apríl 2016.